

RELACION

“PËR

DISA SHITESA DHE NDRYSHIME NË LIGJIN NR. 9270, DATË 29.7.2004 “PËR SISTEMIN E ADRESAVE”, I NDRYSHUAR”

I. QËLLIMI I PROJEKTAKTIT DHE OBJEKTIVAT QË SYNOHEN TË ARRIHEN

Projektakti, konkretisht projektligji “Për disa shtesa dhe ndryshime në ligjin nr. 9270, datë 29.7.2004 “Për sistemin e adresave”, i ndryshuar”, ka për qëllim shtimin e një elementi tjetër përbërës të adresës, krahas tetë elementeve aktualë, konkretisht elementi i nëntë i saj i cili përkon me një kod unik, që identifikon në mënyrë unike vendndodhjen e çdo ndërtese apo trualli të lirë, në shkallë vendi. Ky kod ka për synim lehtësimin e memorizimit të adresës për shtetasit në Republikën e Shqipërisë dhe krijimin e mundësisë për aksesimin e herëpashershëm të dokumentit unik shtetëror, pra Regjistrin Kombëtar të Adresave, që përmban elementët përbërës të adresës.

Gjithashtu, kodi unik nevojitet për të patur një vlerë të minimizuar të shkëmbimit të informacionit midis databazave kombëtare pa qenë e nevojshme që të kalojë i gjithë informacioni me tetë elementët e adresës, por të realizohet edhe përmes 1 (një) elementi të vetëm.

II. VLERËSIMI I PROJEKTAKTIT NË RAPORT ME PROGRAMIN POLITIK TË KËSHILLIT TË MINISTRAVE, ME PROGRAMIN ANALITIK TË AKTEVE DHE DOKUMENTE TË TJERA POLITIKE

Projektligji nuk është planifikuar në Programin e Përgjithshëm Analitik të Projektakteve për Ministrinë e Brendshme.

III. ARGUMENTIMI I PROJEKTAKTIT LIDHUR ME PËRPARËSITË, PROBLEMATIKAT, EFEKTET E PRITSHME

Projektligji “Për disa shtesa dhe ndryshime në ligjin nr. 9270, datë 29.7.2004 “Për sistemin e adresave”, i ndryshuar” propozohet në kuadër të nismës së ndërmarrë në Komitetin e Inovacionit, të mbajtur më datë 15.07.2022, për krijimin e një kodi unik si përfaqësues unik i adresës deri në rang ndërtese.

Në ligjin nr. 9270, datë 29.7.2004 “Për sistemin e adresave”, i ndryshuar, në nenin 2, përcaktohet si vijon:

1. “Adresa shërben për të identifikuar në mënyrë të saktë e unike vendndodhjen e çdo ndërtese, apartamenti apo trualli të lirë, në shkallë vendi, dhe **përbëhet nga këto elemente:**

a) emri i njësisë së vetëqeverisjes vendore, në të cilën ndodhet ndërtesa;

b) emri i njësisë administrative, në të cilën ndodhet ndërtesa;

c) emri i qytetit ose fshatit ku ndodhet ndërtesa;

ç) emri i bulevardit/rrugës/rrugicës/sheshit ose parkut ku ka daljen ndërtesa dhe përcaktohet vetëm me njërin nga elementet e mësipërme. Emri formohet nga shkronja të alfabetit shqip dhe numra arabë, por jo vetëm me numra;

d) numri rendor i ndërtesës, bulevardit /rrugës/rrugicës/parkut ose sheshit. Ky numër rendor mund të jetë:

i) një numër natyror;

ii) dy numra natyrorë, të ndarë me shenjën e fraksionit (/);

dh) numri i hyrjes, që shërben për identifikimin e hyrjes në të njëjtën ndërtesë. Ky numër rendor mund të jetë:

i) një numër natyror;

ii) dy numra natyrorë, të ndarë me shenjën e fraksionit (/);

e) numri i apartamentit, që shërben për identifikimin e një banese/biznesi në një hyrje të ndërtesës. Ky numër rendor mund të jetë:

i) një numër natyror;

ii) dy numra natyrorë, të ndarë me shenjën e fraksionit (/);

ë) kodi postar, i miratuar.

2. Radha e vendosjes së elementeve të adresës përcaktohet me udhëzim të ministrit përgjegjës për rendin dhe sigurinë publike”.

Pra, me synim përmirësimin e elementeve të adresës, krahas 8 (tetë) elementeve përbërëse të adresës, do të shtohet edhe:

Elementi i nëntë i adresës, që do të përkojë me një kod unik dhe mënyra e krijimit e përshkrimi i detajuar teknik i tij do të përcaktohet me Vendim të Këshillit të Ministrave. Më konkretisht, projektligji ka parashikuar se mënyra e kodimit dhe struktura e kodit unik do të përcaktohen me vendim të Këshillit të Ministrave.

Gjithashtu, do të hiqet togfjalëshi “bulevardit/rrugës/rrugicës/parkut ose sheshit”, nga shkronja d), pika 1, e nenit 2 të ligjit aktual, pasi numër përmban vetëm ndërtesa, ndërsa bulevardi, rruga, rrugica, parku apo sheshi nuk identifikohen me numër.

IV. VLERËSIMI I LIGJSHMËRISË, KUSHTETUTSHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBËTAR

Projektligji është në përputhje të plotë me Kushtetutën e Republikës së Shqipërisë dhe në harmoni me legjislacionin vendas.

V. VLERËSIMI I SHKALLËS SË PËRAFRIMIT ME *ACQUIS COMMUNAUTAIRE* (PËR PROJEKTAKET NORMATIVE)

Ky projektligj nuk ka përafrim me *acquis* të Bashkimit Evropian.

VI. PËRMBLEDHJE SHPJEGUESE E PËRMBAJTJES SË PROJEKTAKTIT

Disa nga çështjet kryesore që rregullon projektligji i paraqitur në mënyrë të përmbledhur janë:

Neni 1 përcakton se:

Në nenin 2 bëhen ndryshimet dhe shtesat, si më poshtë, vijojnë:

1. Në shkronjën d), të pikës 1, hiqet togfjalëshi “*bulevardit/rrugës/rrugicës/parkut ose sheshit*”.
2. Në pikën 1, shtohet shkronja “f”, si më poshtë, vijon:
“*f) kodi unik i adresës, i cili identifikon në mënyrë unike vendndodhjen e çdo ndërtese apo trualli të lirë, në shkallë vendi*”.
3. Shtohet pika 3, si më poshtë, vijon:
“*3. Mënyra e kodimit dhe struktura e kodit unik të adresës përcaktohen me Vendim të Këshillit të Ministrave*”.

Neni 2 përcakton se:

Në nenin 33/1 shtohet pika 3, si më poshtë, vijon:

1. “*3. Ngarkohet Këshilli i Ministrave të nxjerrë vendim, në zbatim të nenit 2, pika 3, të këtij ligji*”.

VII. INSTITUCIONET DHE ORGANET QË NGARKOHEN PËR ZBATIMIN E AKTIT

Për zbatimin e këtij projektligji ngarkohen Drejtoria e Përgjithshme e Gjendjes Civile në Ministrinë e Brendshme, njësitë e vetëqeverisjes vendore e çdo institucion tjetër i administratës publike.

VIII. PERSONAT DHE INSTITUCIONET QË KANË KONTRIBUAR NË HARTIMIN E PROJEKTAKTIT

Ky projektligj është hartuar nga Drejtoria e Përgjithshme e Gjendjes Civile dhe Drejtoria e Programimit, Standardizimit dhe Harmonizimit të Kuadrit Rregullator në Ministrinë e Brendshme.

Ky projektligj do të dërgohet për mendim tek ministritë e linjës.

IX. RAPORTI I VLERËSIMIT TË TË ARDHURAVE DHE SHPENZIMEVE BUXHETORE

Projektligji nuk paraqet efekte financiare shtesë për Buxhetin e Shtetit.

**PROPOZUES
MINISTRI I BRENDSHËM**

BLEDAR ÇUÇI